

आकाशवाणी जयपुर-अजमेर  
प्रादेशिक समाचार

- प्रधानमंत्री नरेन्द्र मोदी उच्च स्तरीय बैठक कर र देश मांय पेट्रोलियम, कच्चा तेल, गैस, बिजली अर उर्वरक खेतरां सूं जुड़ी स्थिति री समीक्षा करी।
- मुख्यमंत्री भजनलाल शर्मा विश्व जल दिवस रे मौके पाणी बर्बाद नीं करणे अर आवण वाळी पीढियां खातिर सहेजणे रो हेलो कर्यो।
- प्रदेश मांय जर्जर स्कूल भवनां ने पाछा बणावण खातिर शिक्षा मंत्रालय 300 करोड़ रुपया री मंजूरी दी।
- राज्य मांय आंधी-बारिश री गतिविधियां सूं तापमान मांय 2 सूं 8 डिग्री ताई री गिरावट।

000

पश्चिम एशिया मांय जारी संकट रे बीचे प्रधानमंत्री नरेन्द्र मोदी आज एक उच्च स्तरीय बैठक बुलाई। इण रे चालतां देश मांय पेट्रोलियम, कच्चा तेल, गैस अर ऊर्जा तथा उर्वरक आपूर्ति सूं जुड़ी स्थिति री समीक्षा करीजी। इण मांय देशभर मांय जरूरी चीजां री लगोतार आपूर्ति माथे खास ध्यान देणे रा हुकम दिया गया। बैठक मांय रक्षा मंत्री राजनाथ सिंह, गृह मंत्री अमित शाह, वित्त मंत्री निर्मला सीतारमण, कृषि मंत्री शिवराज सिंह चौहान, सूचना अर प्रसारण मंत्री अश्विनी वैष्णव समेत केई मंत्री हिस्सो लियो। केन्द्र सरकार उपभोक्तावां अर उद्योगां रे हितां री रक्षा खातिर वैश्विक घटनाक्रम माथे लगोतार निगरानी राख रिया है।

प्रदेश मांय रसोई गैस सिलेण्डर सामान्य रूप सूं उपभोक्तावां ने मुहैया करवाया जा रिया है। सगळा जिलां मांय प्रशासन री कानी सूं सर्तकता दळ एल.पी.जी. कालाबाजारी अर अवैध भण्डारण माथे कड़ी निजर राख रिया है। इणी कड़ी मांय कोटपूतली-बहरोड जिला रा रसद अधिकारी शशि शेखर शर्मा बतायो के जिला मांय घरेलू गैस री आपूर्ति सामान्य है। इण रो खासो स्टॉक है। वणां पभोक्तावां सूं पैनिक हो र गैर जरूरी बुकिंग नीं करणे री अरज करी है।

000

प्रधानमंत्री नरेन्द्र मोदी देश मांय किणी भी निर्वाचित सरकार रा सब सूं बत्ती बगत ताई रा नेतृत्व करण वाळा शासनाध्यक्ष बण गया है। श्री मोदी गुजरात रा मुख्यमंत्री अर देश रा प्रधानमंत्री रे तौर माथे साझा रूप सूं 8 हजार 931 दिनां रो कार्यकाल पूरो कर लियो है। श्री मोदी रो नाम सब सूं बत्ती बगत ताई गुजरात रा मुख्यमंत्री पद माथे रेहणे अर प्रधानमंत्री बणणे सूं पैल्यां सब सूं बत्ती बगत ताई मुख्यमंत्री होणे रो रिकॉर्ड भेळो है। श्री मोदी देश रा पैला प्रधानमंत्री है, जकां रो जनम आजादी रे पाछे व्हीयो अर लगोतार तीन बार लोकसभा चुनाव जीत्या है। श्री मोदी लगोतार तीन बार प्रधानमंत्री बणणे वाळा पैला गैर-कांग्रेसी प्रधानमंत्री भी है। वठीने इण बरस फरवरी मांय सोशल मीडिया साइट इंस्टाग्राम माथे श्री मोदी रा फॉलोअर्स री तादाद 10 करोड़ सूं बत्ती व्हेगी है, जकी दुनिया रा किणी भी सेवारत राजनेता सूं बोळी बत्ती है।

000

विश्व जल दिवस रे मौके, प्रधानमंत्री नरेन्द्र मोदी नागरिकां सूं पानी री हर बूंद ने बचाणो अर चौखो उपयोग ने पक्को करने री आपरी प्रतिबद्धता ने दोहराणे रो हेलो कर्यो है। सोशल मीडिया पोस्ट मांय, श्री मोदी कयो के पाणी जीवन रो आधार है अर धरती रे भविष्य ने आकार देवे है। प्रधानमंत्री सतत विकास मांय लाग्योडा, जाग जगावण अर जल संरक्षण री संस्कृति ने बधावो देवण वाळा लोगां री सरावहना भी करी।

केन्द्रीय जल शक्ति मंत्री सी.आर. पाटिल जल महोत्सव 2026 रे समापन कार्यक्रम अर 'सुजल ग्राम संवाद' रे माध्यम सूं देशभर सूं जुड़्या सहभागियां रे साथे संवाद कर्यो। वणां जल जीवन मिशन टू प्वाइंट ओ री गाइडलाइन्स रो भी विमोचन कर्यो।

अटीने मुख्यमंत्री भजनलाल शर्मा विश्व जल दिवस रे मौके पाणी बर्बाद नीं करणे अर आवण वाळी पीढियां खातिर सहेजेणे रो हेलो कर्यो है। विश्व जल दिवस मौके माथे प्रदेशभर मांय केई कार्यक्रम राख्या गया। वठीने सरहदी ज़िला जैसलमेर मांय भूवाड़ा धनाना अर हमीरां री बस्ती समेत केई ठोडां माथे जल जागरूकता कार्यक्रम राख्या गया। वठीने अजमेर मांय जवाजा री पाल माथे जल संसाधन महकमां री कानी सूं कार्यक्रम राख्या गया। इण रे चालता बढे आया सगळा प्रतिभागी जल स्रोत रे संरक्षण रो संकल्प लियो। पी.एच.ई.डी. महकमां री सहायक अभियंता नन्दनी जोशी बतायो के जल संरक्षण रो संदेश जन-जन ताईं पहुंचाणे खातिर केई गतिविधियां भी राखी गयी।

000

केन्द्रीय ऊर्जा मंत्री मनोहर लाल कयो के बिजळी एक मूलभूत जरूरत है अर आम आदमी ताईं सस्ती बिजळी री पहुंच पक्की करणो घणो जरूरी है। वणां नुवी दिल्ली मांय आज राखी ज्या **भारत विद्युत शिखर सम्मेलन 2026** रा समापन सत्र मांय बोलता थकां कयो के **सौभाग्य योजना अर पीएम सूर्य घर** जेडी योजनावां रे माध्यम सूं अबे देश रा दूर दराज हलकां ताईं बिजळी पहुंच चुकी है, जिण मांय सरहदी इलाका भी भेळा है।

000

कोयला अर खान मंत्री जी. किशन रेड्डी काले 7वें चरण री खनिज ब्लॉक नीलामी री सरुआत करेला। इण मांय राजस्थान समेत केई राज्यां रा 19 ब्लॉक भेळा है। इण पहल रो लगस देश री खनिज सुरक्षा ने मजबूत करणो अर स्वच्छ ऊर्जा लक्ष्यां रो समर्थन करणो है। खान मंत्रालय बतायो के आ नीलामी ऑनलाइन व्हेला।

000

मुख्यमंत्री भजनलाल शर्मा प्रदेश मांय जर्जर स्कूल भवनां ने पाछो बणावण खातिर शिक्षा मंत्रालय कानी सूं जारी 300 करोड़ रुपया री मंजूरी खातिर प्रधानमंत्री नरेन्द्र मोदी रो आभार जतायो है। सोशल मीडिया पोस्ट मांय मुख्यमंत्री कयो के प्रदेश मांय शिक्षा ने बधावो देवण खातिर मजबूत आधारभूत संरचना रो निर्माण राज्य सरकार री प्राथमिकता है।

हर पढेसरी ने सुरक्षित, आधुनिक अर प्रेरणादायक शैक्षणिक वातावरण देवण खातिर सरकार प्रयासरत है। मुख्यमंत्री कयो के केंद्र सरकार रे इण सहयोग सूं प्रदेश मांय शिक्षा रा हलकां मांय गुणात्मक सुधार व्हेला अर पढेसरियां ने बेहतर सुविधावां मिल सकेला।

000

मुख्यमंत्री भजनलाल शर्मा प्रदेश रा न्यारा-न्यारा हळकां मांय बेमौसम बिरखा अर ओलावृष्टि सूं काश्तकारां ने व्हीया नुकसान माथे संज्ञान लियो है। वणां सगळा जिला कलेक्टरां ने सर्वे करवा र बेगी ही रपट भेजणे रा हुकम दिया है। श्री शर्मा कयो के राज्य सरकार काश्तकारां री हर परिस्थिति मांय सहायता खातिर पूरी संवेदनशीलता रे साथे तत्पर है। मुख्यमंत्री कयो के राजस्थान री समृद्धि रो आधार अन्नदाता है अर संकट री इण घड़ी मांय सरकार वां रे साथे है।

000

प्रदेश मांय जठे मार्च री सरुआत रे साथे ही गर्मी रो असर बधण लाग्यो हो, वठीने अबे बादळ, बिरखा अर टंडी हवावां तापमान मांय पाछी गिरावट ला दी है। प्रदेश मांय सक्रिय व्हीया नुवा पश्चिमी विक्षोभ रे असर सूं जैसलमेर, बाड़मेर अर श्रीगंगानगर मांय तेज हवावां रे साथे मेह बरस्यो।

वठीने मौसम महकमो आज बीकानेर, सीकर, श्रीगंगानगर, जैसलमेर, डीग अर झुन्झुनू समेत दस जिलां खातिर मौसम महकमो आज बरसात रो येलो अलर्ट बतायो है। साथे ही आं हलकां मांय तेज रपतार हवावां चालणे अर कठी-कठी बिजळी गिरणे री भी आस जतायी है। इण बीच लारला 24 घंटां मांय पश्चिमी राजस्थान रे केई ठोड़ा मांय तेज हवावां रे साथे व्ही बिरखा मौसम रो मिजाज बदळ दियो है। कठी-कठी व्ही फुहारां अर हळकी सूं मध्यम बरसात सूं तापमान मांय गिरावट आयी है। घणखर जगावां माथे पारो सामान्य सूं 2 सूं 8 डिग्री कमती मापो जा रियो है।

000

नगरीय विकास अर स्वायत शासन मंत्री झाबर सिंह खर्चा आज कोटा प्रवास माथे रिया। खबरनवीसां सूं बणतळ मांय वणां कयो के सरकार पंचायत चुनावां खातिर 6 महीना पैले ही पूरी तैयारी कर चुकी है। वणां कयो के चुनावां री तारीख रो ऐलाण अबे उच्च न्यायालय अर चुनाव आयोग माथे निर्भर करे है।

.....

श्री खर्चा ओ भी बतायो के कोटा रिवर फ्रन्ट ने वेडिंग डेस्टीनेशन रे रूप मांय बणायो जावण रा जतन कर्या जा रिया है।

.....

000

प्रदेश रा मुख्य सचिव वी श्रीनिवास आज कोटा-बूंदी ग्रीनफील्ड एयरपोर्ट रे निर्माण री प्रगति री समीक्षा करी। कोटा कलेक्टर सभागार मांय अहलकारां साथे व्ही बैठक मांय मुख्य सचिव कयो के ओ हवाई अड्डो हाड़ौती खेतर रे पर्यटन विकास अर अर्थव्यवस्था खातिर घणो खास है। वणां एन.एच. ए.आई. रा अहलकारां सूं उदयपुर सूं कोटा अर कोटा सूं भरतपुर रे बीचे सम्पर्क स्थिति री भी जाणकारी ली अर इणे बेहतर बणावण खातिर घणो जतन करणे रो कयो। मीडिया सूं बणतळ मांय मुख्य सचिव कयो के ग्रीनफील्ड एयरपोर्ट प्रोजेक्ट ने तय बगत मांय पूरो करणो जरूरी है।

.....

000

चैत्र नवरात्रि रे चौथे दिन आज मां दुर्गा रे कुष्माण्डा स्वरूप री पूजा-अर्चना करी जा रही है। आं ने अष्टभुजा देवी भी कयो जावे है। ऐड़ी मान्यता है के आं री आराधना सूं रोग-शोक दूर हो र स्वास्थ्य अर समृद्धि री प्राप्ति होवे है। काले स्कन्दमाता री आराधना करी जावेली। भारत-पाक सीमा माथे जैसलमेर रा तनोटमाता मंदिर मांय देश रा कोणे-कोणे सूं सिरद्वालु दर्शन खातिर पहुंच रिया है। वठीने लोक पर्व गणगौर रे दूजे दिन आज राजधानी जयपुर मांय बूढ़ी गणगौर माता री सवारी निकाळी जा रही है। सिटी पैलेस री जनानी ढ्योडी सूं सरू व्ही इण सवारी मांय शाही लवाजमो, सज्या-धज्या ऊंट, घोड़ा अर लोक कलाकार हिस्सो ले रिया है।

.....

000

अजमेर जिला मांय सुरक्षा जवानां री भर्ती खातिर काले सूं ब्लॉक स्तरीय कैम्प सरू व्हेला। ऐ शिविर नुवी दिल्ली रा भारतीय सुरक्षा दस्ता परिषद री कानी सूं लगाया जावेला। आं कैम्पां रे माध्यम सूं सुरक्षा जवान, सुरक्षा सुपरवाइजर अर सुरक्षा अहलकारां रा कुल 400 पदां माथे भर्ती करी जावेली। उदयपुर रा एस.आई.एस. सिक्योरिटी कमांडेंट कार्यालय रा प्रमुख राकेश चौधरी बतायो के इण अभियान रा तैत जिला रा युवावां ने संगठित खेतर मांय रोजगार मुहैया करवाया जावेला। 23 मार्च ने केकड़ी, 24 मार्च ने किशनगढ़ अर 25 मार्च ने नसीराबाद मांय कैम्प लगाया जावेला।

000